

REGIONAL NEWS

HEADLINES:-

1. Vawk pul hri ASF leng pawisa lova vawk talh lui leh vawk thi hmun hrang hranga paih te chungah dan anga hremna lekkawh a ni.
2. Mizoram Presbyterian Kohhran bial hrang hrangah Bial Inkhawmpui neih mek a ni a, vawiin hian rorel a ni.
3. Lok Sabha inthlanpui thawh thumna atana campaign chuan a vanglai a thleng chho mek.
4. Nimina inthlan thawhnhina vote thlak zawhfel anih tak avangin state 11 leh Union Territory pathumah chuan vote thlak zawh fel vek a ni tawh.

<><><>

ASF

AH & Vety Department in vawk pul hri African Swine Fever (ASF) leng chungchanga mipui hriattur thuchhuah a siam hnua hri lenna huamchhunga vawk damlo talh lui avangin Police-ah FIR thehluh ani.

FIR-a alan danin Kulikawn leh Salem vengte chu tun thla ni 17 khan ASF lenna hmun, infected area a puan a ni a, Local Council-ah pawh hriattirna pek niin, an ni pawhin khapna thupek hi mipui-ah an an hriattir tawh a chuti chung chuan Pu Sanghluna, Salem veng chuan April ni 20 khan vawk damlo talhin a zuar tih report an dawng a, ani bakah hian Pu Darchhuanthanga, Salem Veng Aizawl chuan Ni 25 khan vawk a talh thu report an dawng leh a, hei hi dan pawisak lohna leh mipui tana thil pawl tak mai thlen thei anih avangin Police te hmalak sak turin an ngen a ni. Thudawn danin Pu Darchhuanthanga hi lockup –ah ala awm a, Pu Sanghluna hi PR Bond a chhuah a ni.

AH&Vety Department in a tarlan danin,tun dinhmun-ah vawk pul hri leng mek avang hian vawk 285 an thi tawh a, vawk 95 te chu ASF vang ni ngei a rinhleleh te chu talh an ni tawh a ni. Hriat theih chinah Aizawl, Champhai, Lunglei leh Khawzawl-ah vawkpui hri leng hi report a ni.

Heti hian AH & Vety Department hotute chuan tunhnaia social media a vawk thi kawng sira paih a awm thu bawh zuiin Muallungthu leh Samtlangah an kal a.

Muallungthu VCP Pu Zonunsiana sawi danin Nimpiniah khan Muallungthu leh Tachhip khaw inkara Zuanbakluiah vawk thi paih hmuh anih thu report an dawng a, a rang thei ang berin a hmunah kalin vawk thi chu a lo puam hman tawh avangin leh a rim te a lo chhiat tawh avangin thelret-a a theih ang anga khuh anih hnua kalsan ani a, Department hotute nen hian vawk thi hi damdawi nena sawngbawl hnua phum nise an ti a, khawtlangah vawk hri leng chungchanga hriattur pawimawh te zau thei ang bera in hrih darh nise an ti bawh.

Samtlang leh Lungleng khaw inkarah pawh vawk thi kawng sirah paih anih thu bawh zuiin Samtlangah hian VC hruaitute hmuh nghal an ni a, Samtlang VCP Pu K.Zahunga chuan vawk thi paih a awm thu an hriat vele VC lamin hma an la nghal a, vawk vulhtute ko khawmin, hmalak dan tur te an sawipui thu ngaihthlak ani.

He vawk thi chungchang hi Department hotute nen sawi ho niin,a phum hunah damdawi te nen sawngbawl a a phum tu turte pawh hmanrua dik tak hmang chung phum tura rel a ni.

Tun dinhmunah Muallungthu leh Samtlangah hian ASF vanga vawk thi report dawn a la ni lo a,vawkvulh tute chiai lo tura hriattir an ni bawh.

VCP chuan Department lam ten rang taka buaipui tura an lokal chu lawmthu a sawi a, Khawtlangah mipuia hriat turin ASF chungchanga awareness tha tak neih nise an ti. Hetianga vawk thi a awm pawhin paih bo mai lo tur leh Vety Department hotute hnena a rang thei ang bera hrih hmasa thin tura puanzar nise an ti bawh. Vawk thi paih chungchangah hian dan anga hmala tura rel ani. Heng vawk thi te hi Department mithiam ten anih dan tur ang taka an buaipui hnua phum an ni.

<><><>

MSPMC

Mizoram State Project Monitoring Committee (MSPMC) chuan nimin khan Hualngohmuna hmalakna kal mek - 'Construction of Solid Waste Management Centre: Phase-I' chu an Vice Chairman, Pu R. Lal Rinawma IRS(rtd) hovin a hmunah an endik.

A hmuhma leh hmalakna awm mekte thlithlai a nih hnuin MSPMC Vice-Chairman chuan a hmunhma chu tangkai thei ang bera hman a tul thu a sawi a. Hna tithuanawp thei, clearance leh thil dang a awm a nih chuan tihfel vat a that thu sawiin bawlhhlawh tawih thei lo (dry waste), awlsam leh felfai zawka thliar anih theih dan tur te, tawih thei (wet waste) khawl hmanga chak leh awlsam zawka tawih raltir theih dan tur, Mechanical compositing-te chu a hmunah engineer leh contractor-te ho nen an sawi ho va. Vice-Chairman chuan tun dinhmunah chuan Phase-II hna kalphung awm dan tur azirin assessment neih leh phawt a that thu a sawi.

Construction of Solid Waste Management Centre: Phase-I hi Special Assistance to States for Capital Expenditure (SASCE) hmanga cheng vbc 16 leh nuiah 64 a fund niin PWD chu Implementing Department a ni a. Phase-I hi tunah kalpui mek niin chu chuan building sak leh kalpawhna kawng siamnate a huam tel a ni.



PRESBYTERIAN BIAL INKHAWMPUI

Mizoram Presbyterian Kohhran bial hrang hrangah Bial Inkhawmpui neih mek a ni a, vawiin hian rorel a ni.

Bial Inkhawmpui hi nimin khan tan niin, nizan khan palai lawmna leh kohhran hrang hrang report ngaihthlak niin, zanin hian vantlang Pathian biak inkhawm neih a ni ang. Pathianni chawhma, chawhnu leh zanah te vantlang Pathian biak inkhawm neih leh a ni ang a. Chawhnu inkhawmah Lalpa Zanriah Sakramen theh a ni ang a, zan inkhawmah Bial chairman kal chhuak turin Valedictory Sermon an sawi ang. Pathian biak inkhawm hun hrang hrangah thupui sawi tura ruatten thuchah an sawi dawn bawk.

Bial Inkhawmpui hi April thla Pathianni vawi 4-naah neih thin a ni a, chutih rualin eng emaw rokhawhna avanga hmang hma hret leh hmang tlai hret an awm bawk a ni.

Mizoram hmun dang te rualin Serchhip Dist a Presbyterian Pastor bial hrang hrang inkhawmpui neih a ni a. Serchhip pastor bial, Serchhip Kawnpui kohhrana neihah, vawiin a rorel palai mi 207 kalkhawm chuan AIDS /HIV Awareness campaign chhimchhak presbytery leh bial huapa neih nise an ti a, hei hi Presbytery a ngaihtuah turin an thlen ang a, an bial bikah erawh chuan hma an la nghal dawn a ni.

Serchhip pastor bial inkhawmpui vawi 90na vawiina rorel, Chairman Rev.Rolungmuana Zadeng kaihhruaiah hian Naupang Sande Sikul inkhawmpuia intihsiaka hman tawh loh tur leh bial hual Hla kutpui neih turin an pass a.

Hriat theih chinah Serchhip Vengchung bial pawhin Bazar kohhranah bial inkhawmpui neiin, New Serchhip bial chuan B.Bukpui kohhranah an nei a. Hmun dang ang bawkin zanin atangin inkhawm hrang hrangah sermon ngaihthlak a ni ang a. Naktuk Pathianni chawhnuah Lalpa zanriah sakramen kil ho in, naktuk Pathianni zanah chairman kal chhuak ten a chairman hun tawp pual thuchah sawiin a tin dawn a ni.

Nikum lam report-a a lan danin tun dinhmunah Mizoram Synod hnuaiiah hian Pastor bial 298 awmin kohhran 1,139 a awm mek bawk a ni. Mizoram Synod website-a tarlan a nih dan chuan, tun dinhmunah Mizoram Presbyterian Church Synod hnuaiiah hian kohhran member nuaih ruk sing hnih sang riat leh 719 an awm mek a, an zinga nuaih thum sang li leh 304 chu mipa niin, hmeichhia nuaih thum sing hnih sangli zali sawm panga an awm bawk a ni.



UPC NEI

United Pentecostal Church (UPC) North East India General Conference vawi 56-na Kolasib-a neih mekah tukin khan Kolasib Diakkawn Headquarters Kohhran Biak In ah General hruaitu thar tur an thlang a, chungte chu: Gen. Superintendent atan Rev. Zohmingthanzama (Gen Secretary nilai); Gen. Secretary atan Rev. Lalmalsawma Sailo (Gen Treasurer nilai) leh Treasurer turin Rev. R. Laichhingpuia (Gen Missions Director nilai) te anni.

Hruaitu tharte hi kum 2024 - 2025 chhung atana thlan niin, kum 2026 April thla a General Conference an neih leh hun ah hruaitu thar an thlang leh ang.

General Superintendent atanga chawl tur Rev. R. Lalrinsanga chu tun thla April ni 29 hian pension in a chhuak dawn a, hemi ni chawhma lamah a pisa kai in, General Superintendent tura thlan Rev. Zohmingthanzama hnenah mawhphurhna a hlan ang.



EIZOC

Ophthalmological Society of Mizoram huaihawtin nimin khan Eastern India Zonal Ophthalmological Congress (EIZOC), 8th MIDCON 2024 chu Aizawl Club-ah neih a ni.

Chief Secretary Dr. Renu Sharma chuan he hun hi a hmanpui, state hrang hrang atanga mit doctor (ophthalmologist) an lo tel bawk a ni.

Dr. Renu Sharma chuan hetiang inhmukkhawm ropui tak Mizorama an hmang hi lawmawm a tih thu sawiin doctor kal khawm ten thiamna thar inhrilhhriat hun atana hmang tangkai turin a fuih. Khawvel changkang zelah hetiang inhmukkhawm hi mi tam takin an tangkai pui ngei a beisei thu a sawi bawk.

He congress hi ni hnih chhung hman tur a ni a, mit hriselna lam kaihnawih chi hrang hrangah seminar leh thusawi a awm dawn a ni.



LOK SABHA CAMPAIGN

Lok Sabha inthlanpui thawh thumna atana campaign chuan a vanglai a thleng chho mek. Political party liana hruaitu lawk tak takten voter te rilru hneh tumin vantlang inkhawm leh kawngzawhte ramchhung hmun hrang hrangah an huaihawt a.

Puan tawh angin inthlanpui thawh thumnaah hian Parliamentary Constituency 95 ah vote thlak a ni dawn a. State 10 leh Union Territory pahnihah May ni 7 khian vote thlak a ni dawn a. Inthlan thawhthumnaah hian candidate 1351 an awm a ni.

Union Home Minister leh Senior BJP leader Amit Shah chuan vawin khan Gujarat-a Porbandar ah thu sawiin NDA sawrkar term thumnaah chuan India chu khawvela eibar zawna lama ram lian pathum zingah a tel ngei tawh dawn a ti.

Congress hruaitu Priyanka Gandhi pawhin vawin khan Gujarat-a Valsad district-a Dharampur ah thu sawiin an party chu an sawrkar anih chuan khawpuiah MGNREGA ni 100 inhlawhna chu khawpuiah tan ve a ni ang a ti a. Tribal mipuite tan hranin special budget ruahman a ni dawn tih sawiin mi rethei, loneitute leh mi hnuaihning zawkte tan theihtawp an chhuah dawn a ni a ti bawk.

Lok Sabha inthlanpui campaign hun hman mekah Prime Minister leh Senior BJP leader Narendra Modia chuan vawin khan Maharastra-a Kolhapur-a Tapovan ground ah thu a sawi a. Pu Modia hian Mahayuti candidate Sanjay Mandik leh Hatkanangle-a ding Dhairysheel Mane te tan a campaign a ni.

Hetihlai hain Congress chuan Kolhapur ah hian Kolhapur lal chungkua ami Chhatrapati Shahu Maharaj an din tir a ni.

Congress General Secretary Priyanka Gandhi pawhin vawin khan Latur district ah hun a hmang bawk a. Congress Canddiat Dr Shivaji Kalge tan a campaign a ni.



VOTING

Nimina inthlan thawhnhinna vote thlak zawhfel anih tak avangin state 11 leh Union Territory pathumah chuan vote thlak fel a ni tawh. Heng state te hi Kerala, Rajasthan, Tripura, Tamil Nadu, Sikkim, Manipur, Meghalaya, Nagaland, Mizoram, Arunachal Pradesh, Uttarakhand leh Union Territories pathum Puducherry, Lakshadweep leh Andaman and Nicobar Islands an ni a.

Inthlan thawhnhinnaah vote zaa 61 tla in Parliamentary seat 88 ah vote thlak a ni.

<><><>